

日出南庄

佢兼來，繡球花笑弛弛仔搵手
月光下心糟糟个影仔鼻等清香
濛煙對目眉毛頭前徙過去
奔等个恁多花色，錫等
正踎床个日頭也定定仔蹶上加里山¹
在天頂洩出金黃偷看，照映恁靚个色水
天光射出緊來緊大蕊个日頭花
神仙谷²个水沖也暢到噴噴出
撥涼旅客个躁火，心痺忒个僵
拂忒現代文明个虐削³摻孤栖
閒于于仔轉到詩中个故鄉

天甫光个洗衫坑，山坑水
緊拚拚仔帶走耕田儕做田事个汗水
還過細人仔搞泥沙个肩槽
順續偷聽婦人家打嘴鼓
水聲摻佢兜个笑聲也緊傳緊遠
歇在櫻花樹頂高該陣青鷓仔⁴
也嘍嘍喳喳爭等問佢，敢知
這兜孔孔翹翹个洗衫枋，摻乃木崎⁵
下坎蹶到上坎，該百過年个石枋仰恁像
踏在腳底，係頭擺阿公核樵燒炭个腳跡
摻細細該下，兄弟姊妹搞泥沙个生趣

行于到南庄國小个路項
看著一隻細田螺也定定仔趕，看花看草
親像圍牆裡背緊來緊知人我个細孺仔
這下淨知攀籬吊壁，未來係寫自家人生个詩人
懵懵懂懂个日仔毋多知仔就會行遠
佢兜敢會像佢，人生過半正怨嘆詩句寫壞忒
抑係有兜心事寫毋得出
佢怕像校園肚這頭百年老楓香

蹇蹇看等身邊跳上跌落个山猴仔
 添忘忒自家早就入土半截，淨希望
 做得又抽出嫩習習个新葉

成時，成時會聽著雷公響無停
 大自然个鬧鐘，敢係提醒莫錯過天時
 喊催記得跔等山林風、河壩水共下敵氣
 曠燼，照等上坎个郵便局
 地動過後美容擲皮過个樣仔
 一半下，雨毛屑仔在屋簷下汀汀汀汀⁶
 乜像懷念往擺晴耕雨讀个閒情
 風鈴聲唱等寄信个想望，單純个過去
 係尋食來到下坎老翹翹个戲院
 一盤薑絲大腸，搗出酸丟丟个心情
 看板花刺必駁，一幅一幅手工个歲月
 褪色个青春掛高高

行到山林壁角，敢係血脈个起點
 有唐山公，無唐山媽个傳說
 一陣風掀開石壁⁷个面紗
 老翹翹个織布機，傳來嘖嘖啞啞个歌聲
 泰雅族女人，手花攏天⁸像仙女指揮交響樂
 一領領白底紅線，行走个日頭⁹
 就風神碌碌仔行出來，看著祖先个光彩
 遠方矮靈結界个濛煙將山崗掬縷縷
 園等浸青个樹、蓬白个桐花、木欄杆个橋
 全部細細義義恬肅肅
 等天色在湖面搖出來，催臥頭向天
 大聲喊「馬阿囉」⁹，該央時
 吾心跔等湖正定定仔對濛沙煙行出來

作者註

1. 加里山：地處苗栗南庄，為苗栗縣第一高峰。
2. 神仙谷：南庄知名景點，以溪谷巨石及瀑布聞名。
3. 虐削：音 ngiog` xioq`，事情不順、心裡不舒服。
4. 青鸞仔：音 qiang` li` e`，鳥名，即綠繡眼。
5. 乃木崎：日本時代臺灣總督乃木希典將軍，至南庄視察，見永昌宮與街道高駁崁阻隔，往來甚為不便，且南庄公學校（今南庄國小）建校在即，命隨員將大屋坑張屋拆除石板移來鋪陳，便利居民、學童上下學通行之用。居民因此取名。崎，客語，坡之意。
6. 汀汀汀汀：音 din` din` din din，形容水不停的自沾溼物體上滴下來。
7. 石壁：「石壁部落」原是個相當熱鬧的部落；1970年因芙安颱風災損，集體遷移到東河社區居住。現地成了石壁染織工藝園區。
8. 手花攏天：音 su` fa` lug` tien`，形容手技很靈巧。
9. 行走个日頭：行走的太陽，泰雅族傳統紡織工藝常用的圖騰。
10. 馬阿囉：賽夏族語，謝謝之意。



作者感言

王興寶

母語創作係涯个使命，做得用客家个觀點看頭擺、現下摻未來，一步一步挖出客家文化底層个意義，豐富臺灣多元社會彩色个世界，係涯快樂歡喜个泉源摻盡大个挑戰。

母語創作一路行來，感覺係一個生命一方面向前看，一方面斡頭體會過去个生活、重新自我解構，還過重新理解、解釋自家生存个時代、環境摻土地个過程，這擺在主辦單位个鼓勵下，相信這個奇妙个過程定著會續等行下去。